

Na osnovu člana 63. stav (1) tačka d) Zakona o visokom obrazovanju (prečišćeni tekst) («Službene novine Tuzlanskog kantona», broj: 21/21, 22/21, 5/22, 11/22 i 16/22) i člana 52. stav (1) tačka b) Statuta JU Univerzitet u Tuzli (Prečišćeni tekst), Senat Univerziteta u Tuzli na sjednici održanoj 17.07.2024. godine, utvrdio je

**PRAVILA STUDIRANJA NA I CIKLUSU STUDIJA  
NA UNIVERZITETU U TUZLI  
(Drugi prečišćeni tekst)**

**I Opšte odredbe**

**Član 1.**

Ovim Pravilima bliže se uređuju: struktura studijskog programa, organizacija i izvođenje studija prvog ciklusa, trajanje studija, sticanje statusa studenta, ponovno sticanje statusa studenta, ovjera semestra i godine, upis u narednu godinu studija, preduslovni premeti, obnova studijske godine, mirovanje statusa studenta, prelazak sa drugog univerziteta, promjena studijskog programa, način prepoznavanja položenih ispita, završetak studija prije utvrđenog roka, nastavak studija nakon završene više škole, vrednovanje rada studenata, završni rad, izdavanje isprava (diploma i dodatak diplomi), kao i druga pitanja od značaja za organizaciju prvog ciklusa studija na Univerzitetu u Tuzli (u daljem tekstu: Univerzitet), u skladu sa zakonom i Statutom Univerziteta.

**Član 2.**

Studij I ciklusa na Univerzitetu organizuje se i ostvaruje u skladu sa pravilima studiranja zasnovanim na Evropskom sistemu prenosa bodova (ECTS).

**II Posebne odredbe**

**Struktura studijskog programa**

**Član 3.**

(1) Studij na prvom ciklusu studija organizuje se i izvodi u skladu sa studijskim programima koje donosi Senat Univerziteta, na prijedlog NNV/UNV fakulteta /ADU, čijim sadržajem se obezbjeđuje savladavanje i sticanje neophodnih znanja i vještina za sticanje diplome odgovarajućeg nivoa i vrste studija.

(2) Studijski program obavezno sadrži sve elemente utvrđene Zakonom o visokom obrazovanju TK (u daljem tekstu: Zakon) i Statutom Univerziteta.

(3) Senat Univerziteta, na početku akademske godine, za oba semestra daje prethodnu saglasnost na prijedlog odluke NNV/UNV fakulteta /ADU o izbornim predmetima iz važećeg u primjeni nastavnog plana i programa koji će se realizovati u određenoj akademskoj godini i koje student može da odabere, uvažavajući Standarde i normative visokog obrazovanja u TK te kadrovske, prostorne i finansijske mogućnosti Univerziteta.

**Organizacija studija**

**Član 4.**

Pravo pristupa visokom obrazovanju na Univerzitetu, odnosno upisu na studijske programe prvog ciklusa studija/integriranog prvog i drugog ciklusa studija na Medicinskom i Farmaceutskom fakultetu, u skladu sa Zakonom i Statutom Univerziteta, pod jednakim uslovima imaju državljani BiH, strani državljani i lica bez državljanstva koja su završila srednju školu u četvorogodišnjem trajanju i položila prijemni ispit za odgovarajući studijski program.

**Član 5.**

(1) Univerzitet, odnosno fakulteti akademija organizuju i izvode akademski studij I ciklusa iz oblasti za koje su matični i akreditovani.

(2) Studijski programi realizuju se po studijskim godinama i semestrima.

(3) Studijska godina se organizuje u dva semestra (zimski i ljetni), od kojih svaki ima 15 nastavnih sedmica.

(4) Kalendar organizacije i realizacije nastave u okviru studijske godine, koji uključuje i termine za završne, popravne i dodatne popravne ispite, utvrđuje i objavljuje Senat Univerziteta najkasnije 15 dana prije početka zimskog semestra akademske godine.

### **Trajanje studija**

#### **Član 6.**

(1) Studij I ciklusa traje najmanje tri i najviše četiri godine studija, koji se vrjednuje sa najmanje 180, odnosno 240 ECTS bodova.

(2) Iz odredbe prethodnog stava izuzima se studij farmacije koji traje pet godina i vrjednuje se sa 300 ECTS bodova, te studij medicine, koji traje šest godina i vrjednuje se sa 360 bodova.

(3) U okviru nastavnog procesa predviđen je sedmični fond od ukupno 40 sati, od čega maksimalni angažman studenta u direktnoj nastavi se utvrđuje nastavnim planom u skladu sa Odlukom Senata.

#### **Član 7.**

Ukupno angažovanje studenta sastoji se od nastave (predavanje, auditorne i/ili praktične vježbe, praksa, seminari i drugo), samostalnog rada (testovi, kolokvijumi, završni ispiti), izrade završnog rada (ukoliko je predviđen studijskim programom), dobrovoljnog rada studenta u lokalnoj zajednici i ostalih vidova angažovanja studenata, na osnovu kojih student ostvaruje odgovarajući broj ECTS bodova.

#### **Član 8.**

(1) Nastava se izvodi prema utvrđenom rasporedu nastave.

(2) Raspored nastave fakultet/Akademija je u obavezi objaviti najkasnije 10 dana prije početka realizacije nastave, putem oglasne ploče i na web stranici fakulteta/Akademije.

#### **Član 9.**

Prisustvo svim vidovima nastave je obavezno i o njemu se vodi evidencija na osnovu koje student, po odslušanom semestru dobija potpis od predmetnog nastavnika, a što se bliže utvrđuje silabusom.

#### **Član 10.**

(1) Predmetni nastavnik obavezan je u prvoj sedmici nastave upoznati studente sa planom rada predmeta.

(2) Studenti imaju pravo na izvod iz plana rada u štampanoj ili web formi.  
Kontinuirana provjera znanja studenata se organizuje uz izvođenje nastave.

#### **Član 11.**

(1) Zadaci predviđeni za individualni rad studenata (seminarski radovi, zadaće, projekti i drugo) moraju biti ravnomjerno raspoređeni u toku semestra.

(2) Ukupni obim obaveza mora biti usklađen sa opterećenjem predviđenim na predmetu i broju ECTS bodova.

(3) Nastavnik je dužan da u toku nastave, izrade samostalnih zadataka i pripreme provjere znanja pomogne studentima organizovanjem konsultacija. Termini konsultacija moraju biti usklađeni sa terminima nastave.

(4) Promjena rasporeda časova nastave može se vršiti u naročito opravdanim slučajevima, uz odobrenje prodekana za nastavu.

#### **Član 12.**

(1) Nastavne aktivnosti (predavanja, vježbe i ispiti) organizuju se, u pravilu, u prostoru Univerziteta.

(2) Dio nastave, praktični rad studenata, stručna praksa, kao i ispiti mogu se održavati i van sjedišta fakulteta/Akademije, odnosno u drugim institucijama i nastavnim bazama Univerziteta, u skladu sa zakonom, Statutom te na osnovu zaključenih sporazuma.

(3) Dio nastave ili cjelokupne nastavne aktivnosti mogu se organizovati i realizovati i učenjem na daljinu, ukoliko je to predviđeno studijskim programom.

(4) Izuzetno od odredbe stava 1. ovog člana, u slučaju proglašenja stanja prirodne i druge nesreće ili proglašenog vanrednog stanja od strane nadležnih institucija Federacije BiH/Kantona, nastava ili pojedini oblici nastave kao i ispiti se mogu organizovati učenjem na daljinu, putem različitih dostupnih softverskih alata, servisa, platformi, pri čemu odluku donosi Senat Univerziteta, uključujući i odabir platforme, vodeći računa o obaveznoj upotrebi jedinstvenog sistema identifikacije, autentifikacije i autorizacije studenata, saradnika i nastavnika putem domene i poddomena untz.ba ili drugim odobrenim domenama na Univerzitetu prilikom pristupa platformi.

(5) Realizacija ispita u slučaju iz stava 4. ovog člana, bliže će se urediti Pravilima o načinu polaganja ispita i ocjenjivanju studenata Univerziteta.

Naučno-nastavno/umjetničko-nastavno vijeće Fakulteta/ADU, na prijedlog dekana i prodekana za nastavu verificira nastavne aktivnosti realizovane na daljinu, na osnovu podnesenih izvještaja nastavnika i saradnika, na propisanim obrascima.

(6) Verifikaciju aktivnosti studenata na daljinu, u skladu sa nastavnim planom i silabusima nastavnih predmeta, vrše nastavnici i saradnici Univerziteta.

(7) Dio nastavnih aktivnosti koje nije moguće realizirati na daljinu (praktična nastava/ ispiti/stručna praksa), Senat Univerziteta će, na osnovu izvještaja NNV/UNV fakulteta/ADU o vrsti i obimu nerealizovanih nastavnih aktivnosti izmijeniti odluku o kalendaru nastave/ ispita/stručne prakse studenata za tekuću akademsku godinu, te u toku trajanja iste osigurati realizaciju nastavnih aktivnosti na način i u obimu utvrđenim Zakonom, Statutom, drugim opštim aktima Univerziteta, te studijskim programom.

### **Sticanje statusa studenta**

#### **Član 13.**

(1) Status studenta na Univerzitetu stiče se upisom na odgovarajući studijski program, u skladu sa zakonom, Statutom i Pravilima i procedurama za prijem i upis studenata u prvu godinu prvog, odnosno integrisanog prvog i drugog ciklus studija.

(2) Pri upisu na studijski program, studenti se pri upisu opredjeljuju za smjer/usmjerenje ukoliko su organizovani, na način i pod uslovima utvrđenim studijskim programom.

(3) Studenti koji su primljeni i upisani u prvu godinu studija, stupaju u ugovorni odnos sa Univerzitetom i zaključuju ugovor u pismenoj formi.

(4) Sadržaj obrasca ugovora, sa bližim elementima ugovora o pravima i obavezama ugovornih strana, u skladu sa sadržajem ugovora koji propisuje ministar obrazovanja i nauke Tuzlanskog kantona, utvrđuje Senat Univerziteta.

### **Jednake mogućnosti za pristup visokom obrazovanju**

#### **Član 14.**

(1) Pravo pristupa sticanju obrazovanja na svim ciklusima studija na Univerzitetu, pod jednakim mogućnostima, isključujući svaki oblik diskriminacije i segregacije, imaju studenti sa invaliditetom, studenti vrhunski sportisti, studenti u radnom odnosu, studenti iz ruralnih područja, samohrane majke, studenti sa specifičnim socijalnim statusom i sl.

(2) Licima iz stava 1. ovog člana, prilikom apliciranja za upis na studijski program, uz ispunjenje opštih i posebnih uslova, omogućiti će se polaganje prijemnog ispita u formi i na način prilagođen njihovim potrebama i u skladu sa resursima Univerziteta.

(3) Lice iz stava 2. ovog člana podnosi pismeni zahtjev dekane fakulteta/ADU, sedam dana prije održavanja prijemnog ispita, uz priloženu odgovarajuću dokumentaciju o pripadnosti kategoriji lica sa posebnim potrebama.

(4) Licu koje ima status studenta sa posebnim potrebama može se odobriti savladavanje studijskog programa, podučavanje i provjera znanja pod posebnim uslovima, što se bliže utvrđuje studijskim programom, odnosno silabusima nastavnih predmeta.

(5) Centar za podršku studentima sa posebnim potrebama ima koordinirajuću ulogu za kategoriju studenata sa invaliditetom.

## **Ponovno sticanje statusa studenta**

### **Član 15.**

- (1) Osoba kojoj je prestao status studenta na fakultetu/Akademiji Univerziteta zbog neupisivanja naredne godine studija ili propuštanjem obnove upisa u istu studijsku godinu može ponovo steći status studenta Univerziteta, pod uslovima da za to postoje prostorne i kadrovske mogućnosti fakulteta/Akademije.
- (2) Osoba kojoj je prestao status studenta fakulteta/Akademije Univerziteta iz razloga izricanja disciplinske mjere za povredu obaveza studenta, može nastaviti studij nakon proteka roka utvrđenog Odlukom o izrečenoj mjeri zapovredu obaveze studenta, pri čemu student nastavlja izvršavanje prava i obaveza po nastavnom planu i programu koji je u primjeni u trenutku ponovnog sticanja statusa studenta.
- (3) Zahtjev za ponovno sticanje statusa studenta u smislu prethodnih stavova podnosi se do 15.07. tekuće akademske godine.
- (4) Ponovno sticanje statusa studenta odobrava dekan rješenjem.
- (5) Rješenjem iz prethodnog stava, utvrđuju se obaveze studenta u nastavi u skladu sa važećim nastavnim planom i programom u primjeni.
- (6) Student kojem se odobrava ponovno sticanje statusa, može nastaviti studij u statusu studenta koji se sam finansira ili vanrednog studenta, ukoliko je studijski program organizovan kao vanredni studij.
- (7) Ponovno sticanje statusa studenta može se odobriti samo jednom u toku studiranja na Univerzitetu.

## **Ovjera semestra i godine**

### **Član 16.**

- (1) Zimski semestar student ovjerava nakon završetka nastave zimskog, a ljetni semestar po završetku nastave ljetnog semestra svake studijske godine.
- (2) Tokom ovjere semestra evidentira se broj ECTS kredita koje je student ostvario. Student koji u ostavljenom roku ne ovjeri zimski, odnosno ljetni semestar obnavlja upis u istu godinu studija.

## **Upis u narednu godinu studija**

### **Član 17.**

- (1) Student koji u toku akademske godine na upisanom studijskom programu položi ispite i stekne 60 ECTS bodova ima pravo upisa u narednu godinu studija na osnovu ostvarenih ECTS bodova iz prethodne godine studija.
- (2) Student može prenijeti u narednu godinu studija odgovarajući broj ECTS bodova utvrđen Statutom, u skladu sa Zakonom.
- (3) Ukoliko student ne ostvari utvrđeni broj ECTS bodova obnavlja upis u istu godinu studija.

## **Preduslovni predmeti**

### **Član 18.**

- (1) Studijskim programom mogu se utvrditi preduslovni nastavni predmeti koje student mora da ispuni (ostvari bodove), kako bi mogao pristupiti polaganju drugih predmeta utvrđenih studijskim programom.
- (2) Preduslovni predmeti su oni predmet(i) iz kojih student mora ostvariti ECTS bodove prije upisa u narednu studijsku godinu.

## **Obnova studijske godine**

### **Član 19.**

- (1) Student koji ne ostvari ECTS bodove iz nekih nastavnih predmeta, ponovo upisuje iste, ako pripadaju grupi obaveznih predmeta, a ako su iz grupe izbornih predmeta, student može ponovno

upisati isti nastavni predmet ili odabrati drugi izborni nastavni predmet da bi ostvario potreban broj ECTS kredita.

(2) Student iz prethodnog stava može iz nepoloženih nastavnih predmeta ponovo slušati nastavu, pri čemu se organizacija nastave u tom slučaju definiše odlukom Senata u zavisnosti od raspoloživih resursa Univerziteta.

### **Mirovanje statusa studenta**

#### **Član 20.**

(1) Prava i obaveze studenta mogu mirovati najviše jednu akademsku godinu.

(2) Prava i obaveze studenta miruju:

- za vrijeme dok je studentica na porodijskom odsustvu odnosno student, otac djeteta, student usvojlac, u slučaju smrti majke ili za slučaj da majka napusti dijete ili je iz opravdanih razloga spriječena da koristi to pravo;
- za vrijeme trajanja bolesti zbog koje nije mogao pohađati nastavu i polagati ispite (što se dokazuje mišljenjem nadležne zdravstvene ustanove);
- radi obavljanja odobrene stručne prakse u zemlji ili inostranstvu;
- iz drugih opravdanih razloga.

(3) Zahtjev za mirovanje prava i obaveza podnosi se prije početka akademske godine.

(4) Zahtjev za mirovanje po osnovu bolničkog liječenja ili trudnoće može se podnijeti u toku akademske godine.

(5) Mirovanje statusa studenta evidentira se u indeksu i matičnoj evidenciji studentske službe.

(6) Po prestanku razloga zbog kojih je zatražio mirovanje, student nastavlja studij prema važećem nastavnom planu i programu.

(7) Rješenje po zahtjevu za mirovanje prava i obaveza studenta donosi dekan fakulteta/Akademije.

(8) Ukoliko student u toku akademske godine u kojoj mu miruje status ostvari prava ili izvršava obaveze, iste će se poništiti.

### **Prelazak sa drugog univerziteta**

#### **Član 21.**

(1) Student drugog javnog univerziteta može preći i nastaviti studij na prvoj ili drugoj godini studija istog/srodnog studijskog programa fakulteta/ADU Univerziteta, u skladu sa Listom srodnih studijskih programa koja čini sastavni dio ovog Pravilnika.

(2) Prelazak u smislu prethodnog stava može se odobriti pod slijedećim uslovima:

- da je studijski program sa kojeg student prelazi akreditovan;
- da je student upisao ljetni semestar tekuće akademske godine na drugom univerzitetu,
- da ima status redovnog studenta u tekućoj akademskoj godini studija i ostvarenih najmanje 25 ECTS bodova u toj studijskoj godini.

(3) Prelazak sa drugog univerziteta može se odobriti za najviše 10 (deset) studenata po studijskom programu, u statusu redovnog studenta koji se sam finansira.

(4) U slučaju da zahtjev za prelazak podnese više od 10 (deset) studenata, odobravanje prelaska vršit će se prema kriteriju ostvarene veće prosječne ocjene u toku studija i ostvarenog većeg broja ECTS bodova.

### **Promjena studijskog programa na Univerzitetu**

#### **Član 22.**

(1) Student Univerziteta može preći sa upisanog studijskog programa na srodan studijski program fakulteta/ADU Univerziteta, u skladu sa Listom srodnih studijskih programa i pod slijedećim uslovima:

- da je proveo najmanje jednu akademsku godinu na drugom studijskom programu,
- da ima status redovnog studenta u tekućoj akademskoj godini i ostvarenih najmanje 25 ECTS bodova, te ostvarenu prosječnu ocjenu od najmanje 8 (osam).

(2) Promjena studijskog programa, u smislu prethodnog stava može se odobriti za najviše 5 (pet) studenata, po studijskom programu, u statusu redovnog studenta u kojem je bio prije promjene studijskog programa.

(3) U slučaju da zahtjev za promjenu studijskog programa podnese više od 5 (pet) studenata, odobravanje se vrši prema kriteriju ostvarene veće prosječne ocjene u toku studija i ostvarenog većeg broja ECTS bodova.

#### **Član 23.**

(1) Konačno odlučivanje po zahtjevu za prelazak sa drugog univerziteta, odnosno promjenu studijskog programa na Univerzitetu mora se završiti prije početka nove akademske godine.

(2) Uz zahtjev za prelazak/promjenu studijskog programa student prilaže uvjerenje o statusu studenta, uvjerenje o postignutom uspjehu na prethodnom studijskom programu, te ovjeren studijski program kod prelaska sa drugog univerziteta.

(3) Student podnosi zahtjev dekanu fakulteta/Akademije najkasnije do 15.07. tekuće akademske godine, a ispisnicu sa drugog univerziteta, odnosno studijskog programa, najkasnije do 01.09. tekuće godine ukoliko se prelazak odobri.

(4) O zahtjevu studenta odlučuje dekan rješenjem.

(5) Prelazak sa drugog univerziteta, odnosno promjenu studijskog programa na Univerzitetu student može koristiti samo jedanput u toku ciklusa studija.

#### **Način prepoznavanja položenih ispita**

#### **Član 24.**

(1) Položeni ispit(i) na prethodno upisanom studijskom programu priznaju se ako predmeti iz kojih su ispiti položeni, po svom sadržaju i obimu odgovaraju nastavnom predmetu drugog studijskog programa od najmanje 80%.

(2) Priznavanjem ispita priznaje se i ocjena kojom je student ocijenjen, te broj bodova u skladu sa nastavnim planom studijskog programa.

#### **Završetak studija prije utvrđenog roka**

#### **Član 25.**

Studentu koji je položio sve ispite iz prethodne godine studija i ostvario ukupnu prosječnu ocjenu od najmanje 9,5 može se, na njegov zahtjev odobriti polaganje 2 (dva) ispita iz naredne studijske godine, zajedno sa ispitima iz tekuće godine.

#### **Nastavak studija nakon završene više škole**

#### **Član 26.**

(1) Licu koje je steklo šesti stepen stručne spreme (viša škola) po ranijem sistemu obrazovanja može se odobriti nastavak studija i sticanje statusa studenta na odgovarajućem studijskom programu, prema nastavnom planu i programu u primjeni, ako je istim to predviđeno, uz prethodno izvršenu ekvivalenciju završenog studija.

(2) U slučaju da zahtjev za nastavak studija podnese više od 20 lica, odobravanje nastavka studija vrši se uz prethodno odobrenje Senata Univerziteta.

(3) Zahtjev za nastavak studija podnosi se do 31.08. tekuće akademske godine, uz podnošenje odgovarajućih dokaza.

(4) Lice kome se odobri nastavak studija stiče status studenta koji se sam finansira.

#### **Mobilnost studenata**

#### **Član 27.**

(1) Student ima pravo da u toku trajanja studija provede određeno vrijeme (semestar ili studijsku godinu) na drugoj visokoškolskoj ustanovi, posredstvom međunarodnih programa za razmjenu

studenta, ili na bazi bilateralnih ugovora između univerziteta, pri čemu se studentu priznaje odgovarajući broj ECTS bodova.

(2) Postupak za boravak na drugoj visokoškolskoj ustanovi način priznavanja ostavrenih bodova kao i druga pitanja uređuju se posebnim opštim aktom kojeg donosi Senat.

### **Završni rad**

#### **Član 28.**

Studijskim programom prvog ciklusa studija može biti predviđena izrada i odbrana završnog rada. Postupak izrade i odbrane završnog rada provodi se u skladu sa posebnim opštim aktom kojeg donosi Senat Univerziteta.

### **Izdavanje isprava**

#### **Diploma i dodatak diplomi**

#### **Član 29.**

(1) Studentu koji je položio sve ispite predviđene studijskim programom i ispunio sve ostale obaveze propisane Statutom Univerziteta i ovim Pravilima izdaje se diploma I ciklusa studija i dodatak diplomi.

(2) Dodatkom diplome I ciklusa studija detaljnije se daju informacije o nivou, prirodi, sadržaju, sistemu i pravilima studiranja, te o postignutim rezultatima tokom studija.

(3) Obrazac i sadržaj dodatka diplomi utvrđuje Senat Univerziteta na prijedlog Prorektora za nastavu i studentska pitanja.

#### **Član 30.**

(1) Diplomom o završenom I ciklusu studija potpisuju Rektor i Dekan Fakulteta/Akademije.

(2) Dodatak diplome potpisuje dekan fakulteta/Akademije.

(3) Diplome se uručuju na svečanoj promociji.

### **Druge isprave**

#### **Član 31.**

(1) Fakultet/ADU upisanom studentu izdaje i druge javne isprave i to: indeks, uvjerenje o diplomiranju, uvjerenje o položenim ispitima tokom studija, uvjerenje o uspjehu postignutom tokom studija, ispisnicu i druge isprave u skladu sa zakonom i drugim propisom o sadržaju javnih isprava koji donosi ministar.

(2) O izdatim ispravama studentska služba vodi posebnu evidenciju.

(3) Studentska služba fakulteta/Akademija vodi protokol o izdatim ispravama.

### **Studentska identifikaciona kartica**

#### **Član 32.**

Univerzitet može da izda studentsku identifikacionu karticu kao dokaz da je određeno lice student Univerziteta, kojom se obezbjeđuje:

- pristup svim prostorima u kojima se izvode studijski programi i drugi programi;
- korištenje biblioteke, računarskih učionica, osim ako nisu predviđena posebna pravila registracije studenta;
- pristup sportskim i drugim objektima kojim raspolaže Univerzitet;
- korištenje studentske menze i sl.

### **III Prelazne i završne odredbe**

#### **Član 33.**

Drugi prečišćeni tekst Pravila studiranja na prvom ciklusu studija na Univerzitetu u Tuzli obuhvata:

- Pravila studiranja na prvom ciklusu studija na Univerzitetu u Tuzli (Prečišćeni tekst) br: 03-2351-1-3/20 od 29.05.2020. godine i  
-Odluku o izmjenama i dopunama Pravila studiranja na prvom ciklusu atudija na Univerzitetu u Tuzli broj: 03-2351-1-6/20 od 29.05.2020. godine.

**Član 34.**

Drugi prečišćeni tekst Pravila studiranja na prvom ciklusu studija na Univerzitetu u Tuzli primjenjuje se od dana usvajanja, a važnost njegovih odredaba utvrđena je Pravilima studiranja na prvom ciklusu studija na Univerzitetu u Tuzli (Prečišćeni tekst) i Odlukom o izmjenama i dopunama Pravila, koji su obuhvaćeni ovim Pravilima.

UNIVERZITET U TUZLI  
SENAT  
Broj: 03-3990-1-17/24  
Tuzla, 17.07.2024. godine



**PREDSJEDAVAJUĆI SENATA**  
po ovlaštenju

**Dr. sci. Amir Karić, red.prof.**

*Amir Karić*